



Broj: PD-129/25

Sarajevo, 5. 6. 2025. god.

PARLAMENTARNA SKUPŠTINA BOSNE I HERCEGOVINE
PREDSTAVNIČKI DOM

n/r predsjedavajućeg Denisa Zvizdića

BOSNA I HERCEGOVINA PARLAMENTARNA SKUPŠTINA BOSNE I HERCEGOVINE SARAJEVO			
PRIMLJENO: 05-06-2025			
Organizaciona jedinica	Klasifikaciona oznaka	Redni broj	Broj priloga
01	- 02-1-	1314	25

Predmet: Prijedlog zakona o izmjenama i dopunama Zakona o Vijeću ministara Bosne i Hercegovine, dostavlja se

Na osnovu člana 104. stav (1) i člana 105. Poslovnika Predstavničkog doma Parlamentarne skupštine Bosne i Hercegovine ("Službeni glasnik BiH", br. 79/14, 81/15, 97/15, 78/19, 26/20, 53/22, 59/23, 87/23 i 50/24), (u daljnjem tekstu: Poslovnik Predstavničkog doma), kao ovlašteni predlagač, dostavljam Vam Prijedlog zakona o izmjenama i dopunama Zakona o Vijeću ministara Bosne i Hercegovine (u daljnjem tekstu: Prijedlog zakona), radi razmatranja i usvajanja u Parlamentarnoj skupštini Bosne i Hercegovine.

Predlažem da se Prijedlog zakona razmatra po hitnom postupku u skladu sa članom 133. stav (1) Poslovnika Predstavničkog doma.

U prilogu Vam dostavljam tekst Prijedloga zakona na bosanskom jeziku s obrazloženjem, odredbe zakona koje se mijenjaju, prečišćeni tekst zakona, te elektronsku verziju Prijedloga zakona.

S poštovanjem,

POSLANIK
PREDSTAVNIČKOG DOMA
Jasmin Emrić

Dostavljeno:

① Naslovu,

2. A/a.

PRIJEDLOG

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine na _____ sjednici Predstavničkog doma, održanoj _____ 2025. godine i _____ sjednici Doma naroda, održanoj _____ 2025. godine, usvojila je

Z A K O N **O IZMJENAMA I DOPUNAMA ZAKONA O VIJEĆU MINISTARA** **BOSNE I HERCEGOVINE**

Član 1.

U Zakonu o Vijeću ministara Bosne i Hercegovine ("Službeni glasnik BiH", br. 38/02, 30/03, 42/03, 81/06, 76/07, 81/07, 94/07, 24/08) u članu 10d. stav 2. iza riječi: "Vijeća ministara" dodaju se riječi: "ili Komisija za pripremu izbora Vijeća ministara Predstavničkog doma Parlamentarne skupštine Bosne i Hercegovine (u daljnjem tekstu:Komisija)", a iza riječi: "zatražit će od lica koje se imenuje" dodaju se riječi: "ili predloženog kandidata".

U stavovima 3. i 4. iza riječi: "imenovanje" dodaju se riječi: "ili Komisija".

U stavovima 5. i 6. iza riječi: "nadležnom za imenovanje" dodaju se riječi: "ili Komisiji".

U stavu 7. iza riječi: "Vijeća ministara" dodaju se riječi: "ili Komisiji".

Član 2.

U članu 10e. stav 2. iza riječi: "Vijeća ministara" dodaju se riječi "ili Komisija".

Član 3.

U članu 10f. stav 1. riječi: "za pripremu izbora Vijeća ministara Predstavničkog doma Parlamentarne skupštine Bosne i Hercegovine (u daljnjem tekstu:Komisija)" se brišu.

Član 4.

U članu 10g. stav 3. iza riječi: "licu" dodaju se riječi: "ili predloženom kandidatu"

Iza stava 5. dodaju se novi stavovi 6. i 7. koji glase:

"U slučaju postupanja Komisije u skladu sa članom 14a. stav 5. ovog zakona, te na osnovu provedenog postupka radi pribavljanja informacija iz člana 10f. stav 1. tačke: a) i b) ovog zakona, Komisija u roku od osam dana od dana pribavljenih informacija odlučuje o imenovanju predloženog kandidata za ministra ili zamjenika ministra, te odluku o imenovanju odmah dostavlja Predstavničkom domu na odobravanje.

Ako Komisija ne imenuje predloženog kandidata za ministra ili zamjenika ministra u skladu sa stavom 6. ovog člana, odmah o tome obavještava predlagача iz člana 14a. stav 1. ovog zakona i predsjedavajućeg Vijeća ministara, s navođenjem razloga zbog kojih predloženi kandidat nije imenovan.”

Član 5.

U članu 10h. iza riječi: “preporuku Komisije” dodaju se riječi: “ili odluku Komisije o imenovanju ministra ili zamjenika ministra.”.

Član 6.

U članu 13. iza riječi: “izglasati nepovjerenje Vijeću ministara”, briše se interpukcijski znak tačka, dodaje se zarez i nove riječi: “ali dužnost obavlja do potvrde novog predsjedavajućeg i članova Vijeća ministara.”.

Član 7.

U članu 14. stav 3. iza riječi: “ili ako je trajno spriječen da vrši svoju dužnost,” dodaju se riječi: “ili ako je smijenjen”, a iza riječi: “ili zamjenik ministra trajno spriječen da vrši svoju dužnost” dodaju se riječi: “ili od dana njegove smjene”.

Član 8.

Iza člana 14. dodaje se novi član 14a. koji glasi:

“Član 14a.

“Ako predsjedavajući Vijeća ministara ne imenuje ministra ili zamjenika ministra u roku koji je propisan u članu 14. stav 3. ovog zakona prijedlog kandidata za ministra ili zamjenika ministra predsjedavajućem Vijeća ministara radi imenovanja u skladu s postupkom predviđenim ovim zakonom može dostaviti najmanje 14 poslanika (u daljnjem tekstu: predlagач).

Ukoliko je dostavljeno više prijedloga kandidata za ministra ili zamjenika ministra predsjedavajući Vijeća ministara prvo postupi po prijedlogu koji je prvi dostavljen za imenovanje.

Predsjedavajući Vijeća ministara u roku od tri dana od prijema prijedloga kandidata za ministra ili zamjenika ministra iz stava 1. ovog člana postupi u skladu sa članom 10d. stav 2. ovog zakona, a o čemu obavještava predlagача iz stava 1. ovog člana.

Ukoliko predlagач kandidata za ministra ili zamjenika ministra od predsjedavajućeg Vijeća ministara ne dobije obavještenje u roku koji je propisan stavom 3. ovog člana ili ako predsjedavajući Vijeća ministara prekine postupak imenovanja bez obrazloženja, predlagач podnosi zahtjev Komisiji da od predloženog kandidata za ministra ili zamjenika ministra zatraži dostavljanje svih informacija iz člana 10d. stav 1. ovog zakona, te da u skladu s ovim zakonom provede postupak imenovanja za predloženog kandidata.

Komisija u roku od osam dana postupa po primljenom zahtjevu iz stava 4. ovog člana, te u skladu s članom 10d. stav 2. ovog zakona pokreće postupak imenovanja za predloženog kandidata.”

Član 9.

U članu 15. stavu 1., 3. i 4. iza riječi: “Ako” dodaju se riječi: “Predstavnički dom”, a riječi: “Parlamentarna skupština” zamjenjuju se riječima: “Parlamentarne skupštine”.

Iza stava 1 dodaje se novi stav 2. koji glasi:

“Predstavnički dom Parlamentarne skupštine Bosne i Hercegovine može donijeti odluku o smjeni ministra ili zamjenika ministra i na svoju inicijativu.”

Dosadašnji stavovi 2. 3. i 4. postaju stavovi 3. 4. i 5.

Član 10.

Ovaj zakon stupa na snagu osmog dana od dana objavljivanja u "Službenom glasniku BiH."

PSBiH, broj _____/25

_____ 2025. godine

S a r a j e v o

Predsjedavajući
Predstavničkog doma
Parlamentarne skupštine BiH

Predsjedavajući
Doma naroda
Parlamentarne skupštine BiH

O B R A Z L O Ž E N J E

I – USTAVNI OSNOV ZA DONOŠENJE ZAKONA

Ustavni osnov za donošenje Zakona o izmjenama i dopunama Zakona o Vijeću ministara Bosne i Hercegovine sadržan je odredbama člana IV 4. a) Ustava Bosne i Hercegovine kojim je propisano da je Parlamentarna skupština Bosne i Hercegovine nadležna za donošenje zakona koji su potrebni za vršenje funkcije Parlamentarne skupštine Bosne i Hercegovine po Ustavu Bosne i Hercegovine.

II – RAZLOZI ZA DONOŠENJE ZAKONA

Ovim zakonom vrše se izmjene i dopune Zakona o Vijeću ministara Bosne i Hercegovine ("Službeni glasnik BiH", br. 38/02, 30/03, 42/03, 81/06, 76/07, 81/07, 94/07, 24/08) (u daljnjem tekstu: Zakon) radi uređivanja postupka imenovanja ministara i zamjenika ministara u slučajevima kada lica koja vrše navedene funkcije podnesu ostavku ili budu smijenjeni.

U članu 14. i 15. Zakona o Vijeću ministara Bosne i Hercegovine propisano je da u slučaju podnošenja ostavke ili smjene ministra ili zamjenika ministra predsjedavajući Vijeća ministara dužan je u skladu s postupkom i rokovima propisanim tim zakonom imenovati novog ministra ili zamjenika ministra, a da ministar ili zamjenik ministra preuzima dužnost nakon što ga potvrdi Predstavnički dom Parlamentarne skupštine Bosne i Hercegovine.

Međutim, Zakonom o Vijeću ministara Bosne i Hercegovine nije uređen postupak imenovanja ministra ili zamjenika ministra u slučaju kada predsjedavajući Vijeća ministara ne imenuje ministra ili zamjenika ministra u rokovima koji su određeni odredbama tog zakona, te kada je postupak imenovanja u stanju mirovanja, a zamjenici ministra vrše tu funkciju s neizvjesnim vremenskim periodom trajanja.

Takav nedopušten odnos predsjedavajućeg Vijeća ministara prema obavezi da provede postupak imenovanja ministra ili zamjenika ministra u skladu s rokovima koji su propisani odredbama Zakona o Vijeću ministara Bosne i Hercegovine potrebno je spriječiti izmjenama i dopunama tog zakona propisujući jasan i nedvosmislen tok postupka imenovanja koji neće ovisiti o subjektivnoj procjeni i volji predsjedavajućeg Vijeća ministara, te će mu uskratiti mogućnost odugovlačenja tog postupka iz političkih razloga i sličnog konteksta.

Nepostupanje predsjedavajućeg Vijeća ministara u skladu s odredbama kojima je uređen postupak i rokovi imenovanja ministra ili zamjenika ministra narušava sastav Vijeća ministara iz člana 6. Zakona kojim je propisano da će ukupni sastav Vijeća ministara u toku cijelog mandata biti u potpunosti u skladu sa Ustavom Bosne i Hercegovine.

III – RAZLOZI ZA HITNI POSTUPAK

Na osnovu aktuelnog stanja upražnjene pozicije ministra sigurnosti koji je podnio ostavku i višemjesečnog odugovlačenja postupka imenovanja njegovog nasljednika od strane predsjedavajućeg Vijeća ministara opravdana je hitnost postupka izmjena i dopuna Zakona o Vijeću ministara Bosne i Hercegovine, kako bi se osigurala neprekinutost postupka imenovanja određivanjem alternativnog organa za nastavak postupka u slučaju prekida ili stanja mirovanja kao i konkretnih rokova za svako postupanje u cjelokupnom postupku imenovanja.

Radi se o izmjenama i dopunama zakona visokog stepena hitnosti, a isti je formuliran na jednostavan način tako da se može razmatrati u jednom čitanju.

IV – PRINCIPI NA KOJIMA JE PRIJEDLOG ZAKONA ZASNOVAN

Prijedlog zakona o izmjenama i dopunama Zakona o Vijeću ministara Bosne i Hercegovine (u daljnjem tekstu: Prijedlog zakona) zasnovan je na principima zakonitosti, efikasnosti, odgovornosti i transparentnosti u provođenju postupka imenovanja članova Vijeća ministara.

V – OBRAZLOŽENJE PREDLOŽENIH PRAVNIH RJEŠENJA

Članom 1. Prijedloga zakona dopunjava se član 10d. Zakona o Vijeću ministara Bosne i Hercegovine (u daljnjem tekstu: Zakon na način da se, u slučaju kada predsjedavajući Vijeća ministara ne postupi po prijedlogu najmanje 14 poslanika za imenovanje predloženog kandidata za ministra ili zamjenika ministra, određuje Komisija za pripremu izbora Vijeća ministara Bosne i Hercegovine (u daljnjem tekstu: Komisija) da provede postupak imenovanja u skladu s odredbama ovog zakona.

Članom 2. Prijedloga zakona dopunjava se član 10e. stav 2. Zakona kako bi se omogućilo da Komisija može nastaviti s postupkom imenovanja ministra ili zamjenika ministra uz ispunjavanje kriterija koji su utvrđeni tim članom i stavom.

Članom 3. Prijedloga zakona briše se puni i skraćeni naziv Komisije u članu 10f. u stavu 1. jer je njen puni i skraćeni naziv naveden dopunom člana 10d. stav 2. Zakona.

Članom 4. Prijedloga zakona omogućava se Komisiji da može odlučiti, u rokovima iz člana 10g. stav 2., da održi sjednicu na kojoj će postavljati pitanja imenovanom licu ili predloženom kandidatu vezano za informacije iz člana 10f. Zakona i u pogledu njegove podobnosti za obavljanje poslova na položaju za koji se predlaže.

Član 10g. dalje se dopunjava novim stavovima 6. i 7., s tim da se stavom 6. određuje da u slučaju postupanja Komisije u skladu s novim članom 14a. stav 5. ona u zadanom roku odlučuje o imenovanju predloženog kandidata za ministra ili zamjenika ministra, te odluku o imenovanju odmah dostavlja Predstavničkom domu na odobravanje.

Stav 7. propisuje obavezu Komisije da, ako ne imenuje predloženog kandidata za ministra ili zamjenika ministra u skladu sa stavom 6. ovog člana, odmah obavještava predlagača iz novog člana 14a. stav 1. Prijedloga zakona i predsjedavajućeg Vijeća ministara, s navođenjem razloga zbog kojih predloženi kandidat nije imenovan.

Članom 5. Prijedloga zakona dopunjava se član 10h. Zakona tako da je propisano da Predstavnički dom donosi odluku o potvrđivanju lica imenovanog na dužnost ministra ili zamjenika ministra u roku od tri dana od dana kada je primio odluku Komisije o imenovanju ministra ili zamjenika ministra.

Članom 6. Prijedloga zakona dopunjava se član 13. tako što se određuje da će Vijeće ministara, nakon što mu Parlamentarna skupština, na svoju inicijativu, izglasa nepovjerenje obavljati dužnost do potvrde novog predsjedavajućeg i članova Vijeća ministara.

Članom 7. Prijedloga zakona dopunjava se član 14. stav 3. Zakona tako što je propisano da će, i u slučaju kada ministar ili zamjenik ministra bude smijenjen, predsjedavajući Vijeća ministara imenovati njegovog nasljednika najkasnije u roku od 15 dana od dana njegove smjene.

Članom 8. Prijedloga zakona dodaje se novi član 14a. kojim je određeno da, ako predsjedavajući Vijeća ministara ne imenuje ministra ili zamjenika ministra u roku koji je propisan u članu 14. stav 3. Zakona, prijedlog kandidata za ministra ili zamjenika ministra predsjedavajućem Vijeća ministara radi imenovanja u skladu s postupkom predviđenim Zakonom može dostaviti najmanje 14 poslanika (u daljnjem tekstu: predlagač).

U slučaju da bude dostavljeno više prijedloga kandidata za ministra ili zamjenika ministra predsjedavajući Vijeća ministara prvo postupa po prijedlogu koji je prvi dostavljen za imenovanje.

Kada primi prijedlog kandidata za ministra ili zamjenika ministra od predlagača ovim članom Prijedloga zakona propisano je da predsjedavajući Vijeća ministara u roku od tri dana postupa u skladu s članom 10d. stav 2. Zakona, a o čemu u tom roku obavještava predlagača.

U slučaju da predlagač kandidata za ministra ili zamjenika ministra od predsjedavajućeg Vijeća ministara ne dobije obavještenje u roku koji je propisan novim članom 14a. u stavu 3. ili ako predsjedavajući Vijeća ministara prekine postupak imenovanja, predlagač podnosi zahtjev Komisiji da od predloženog kandidata za ministra ili zamjenika ministra zatraži dostavljanje svih informacija iz člana 10d. stav 1. ovog zakona, te da u skladu sa Zakonom provede postupak imenovanja za predloženog kandidata.

Ovim članom Prijedloga zakona određeno je da Komisija u roku od osam dana postupa po primljenom zahtjevu predlagača, te da u skladu s članom 10d. stav 2. ovog zakona pokreće postupak imenovanja za predloženog kandidata.

Članom 9. Prijedloga zakona u članu 15. je određeno da Predstavnički dom Parlamentarne skupštine donosi odluku o potvrdi smjene ministra ili zamjenika ministra, te da Predstavnički dom Parlamentarne skupštine Bosne i Hercegovine može donijeti odluku o smjeni ministra ili zamjenika ministra i na svoju inicijativu.

Članom 10. Prijedloga zakona utvrđuje se momenat stupanja na snagu.

VI – PROCJENA FINANSIJSKIH SREDSTAVA NEOPHODNIH ZA PROVOĐENJE ZAKONA

Za provođenje ovog zakona nisu potrebna dodatna finansijska sredstva.

PRILOG:

1. ODREDBE ZAKONA KOJE SE MIJENJAJU

2. ZAKON O VIJEĆU MINISTARA BOSNE I HERCEGOVINE – prečišćeni tekst

1. ODREDBE ZAKONA KOJE SE MIJENJAJU

Понедељак, 9. 10. 2006.

СЛУЖБЕНИ ГЛАСНИК БИХ

Број 81 - Страна 7001

Члан 101.

Поступак именовања и потврђивања предједавајућег Савета министара прописан овим Законом биће завршен најкасније у року од 22 дана од конституирајуће седнице Представничког дома.

Поступак именовања и потврђивања министара и замјеника министара прописан овим Законом биће завршен најкасније у року од 70 дана од конституирајуће седнице Представничког дома.*

Члан 4.

Иза члана 11. додаје се нови члан 11а, који гласи:

*Члан 11а.

Сматра се да је Савет министара успостављен и оперативан када се испуне следећи услови:

- а) да је предједавајући Савета министара именован и потврђен у складу са законом;
- б) да је број министара и замјеника министара који су именовани и потврђени у складу са законом довољан да се обезбједи да Савет министара може одржавати седнице и доносити одлуке или поступати у складу са овим Законом.

Док Савет министара не буде успостављен и оперативан у складу са ставом 1. овог члана, детаљнији Савет министара остаје у техничком мањитету*.

Члан 5.

Иза члана 43. додаје се нови члан 43а, који гласи:

*Члан 43а.

До избора 2014. године, за сва именовања и потврде именовања на функцији из чл. 9. и 10. овог Закона који се изврше у том периоду, свако лице дужно је да, осим информација из чл. 10а и 10б овог Закона, наведе и то да ли је икада било објективно одлуком Високог представника донесеном у складу с Анексом 10. Општег оквирног споразума за мир у Босни и Херцеговини, или се на њега односила одлука за опструкције или активности у супротности са Општим оквирним споразумом за мир у Босни и Херцеговини коју је донио РПТФ на основу Анекса 11. Општег оквирног споразума за мир у Босни и Херцеговини, или се на њега односила одлука за опструкције или активности у супротности са Општим оквирним споразумом за мир у Босни и Херцеговини донесена према одредбама Главе 14. Угласа странама издатим према Анексу 1А. Општег оквирног споразума за мир у Босни и Херцеговини, без обзира на то да ли су правне последице те одлуке касније престале, ограничене или на други начин промијењене.

У периоду из става 1. овог члана Предједништво БиХ и предједавајући Савет министара, осим информација из члана 101 овог Закона, достављају Комисији и информацију из става 1. овог члана.

У период из става 1. овог члана укључени су и избори 2010. године*.

Члан 6.

Овај Закон ступа на снагу осмог дана од дана објављивања у "Службеном гласнику БиХ".

ПСБиХ број 368/06
20. септембра 2006. године
Сарајево

Предједавајући Представничког дома Парламентарне скупштине БиХ Мартин Рајач, с. р.	Предједавајући Дома народа Парламентарне скупштине БиХ Горан Милојевић, с. р.
---	--

На основи члана IV, 4а) Устава Босне и Херцеговине, Парламенту скупштине Босне и Херцеговине, на 85. седници Представничког дома, одржаној 18. септембра 2006. године, и на 63. седници Дома народа, одржаној 20. септембра 2006. године, усвојила је

ZAKON

O IZMJENAMA I DOPUNAMA ZAKONA O VIJEĆU MINISTARA BOSNE I HERCEGOVINE

Члан 1.

У Закону о Вјећу министара Босне и Херцеговине ("Службени гласник БиХ", бр. 30/03 и 42/03) члану 9. став 1. иза riječi: "Предједништво Босне и Херцеговине" додају се riječi: "саслано поступку утврђеном овим Законом".

У ставу 2. riječi: "осам (8)" замјенију се бројем "15".

Став 5. брише се.

Члан 2.

У члану 10. став 1. мијенја се и гласи:

"Према члану V, 4. Устава Босне и Херцеговине, предједавајући Вјећа министара, најкасније у року од 35 дана од дана када Представнички дом потврди његово именовање, а у складу с поступком утврђеним овим Законом, именује ministre i замјенике ministara i тражи од Представничког дома потврду именовања."

Став 3. брише се.

Члан 3.

Иза члана 10. додају се нови 81, 10а., 10б., 10с., 10д., 10е., 10ф., 10г., 10и., и 10л., који гласе:

*Члан 10а.

Кандидат за дужност предједавајућег Вјећа министара и кандидат за дужности ministara i замјеника ministara именују се и потврђују саслано поступку утврђеним овим Законом.

Члан 10б.

За предједавајућег Вјећа министара, ministara i замјеника ministara се може се именовати lice за које Централна изборна комисија Босне и Херцеговине (и даљњем тексту: Изборна комисија) изврши да не испуњава увјете из члана 10с. овог Закона.

Члан 10с.

Да ли lice могло бији именовано, потребно је да:

- а) испуњава све потребне увјете за избор кандидата прописане Изборним законом Босне и Херцеговине и да се на њега не односи ниједна неспојивост дужности прописана тим законом;
- б) је доставио све информације које су потребне Изборној комисији да испуни своје обавезе из Закона о сакобу интереса и институцијама власти Босне и Херцеговине и стицају да је потврђено именовање tog lica.

Члан 10д.

Прије него што Предједништво Босне и Херцеговине (и даљњем тексту: Предједништво БиХ) именује предједавајућег Вјећа министара из члана 9. овог Закона, затражит ће од lica које се именује да достави sljedeće:

- а) потписану изјаву на обрасцу који prepisuje Изборна комисија у којој наводи:
- 1) податке о својој стручној спреми, раније дужности, односно послове које је обављало, као и одговорности које је имало у обављанју тих дужности или послова;

- 2) da li je protiv njega izrečena kazna za krivično djelo;
- 3) da li je protiv njega potvrđena opoznata;
- 4) podatke o svojoj aktivnosti u periodu od januara 1992. do decembra 1995. godine, uključujući i informacije koje se odnose na zaposlenje, obavljanje političkih dužnosti, kao i angažman u organiziranim snagama ili policiji u tom periodu;
- 5) podatke u vezi sa svojim imovnim stanjem, uključujući i podatke o finansijskim sredstvima i interesima;
- 6) pristanak da Državna agencija za istrage i zaštitu (u daljnjem tekstu: SIPA) provjeri istinitost informacija datih u potpisanoj izjavi;
- 7) kontakt-informacije: jedinstveni matični broj, broj lične karte ili broj pasoša,

b) uređno ispunjene obrasce koje propisuje Izborna komisija koji sadrže sve informacije koje su Izornoj komisiji potrebne da utvrdi da li navedeno lice ispunjava sve uvjete propisane u članu 10c. ovog Zakona.

Prije nego što predsjedavajući Vijeća ministara imenuje ministra ili zamjenika ministra, zatražit će od lica koje se imenuje dostavljanje svih informacija iz stava 1. ovog člana.

Organ nadležan za imenovanje prosjeđuje SIPA bez odlaganja informacije dostavljene na osnovu stava 1. tačke a) ovog člana.

Organ nadležan za imenovanje prosjeđuje Izornoj komisiji bez odlaganja informacije dostavljene na osnovu stava 1. tačke b) ovog člana.

Saglasno članu 3. stav 1. tačka 8. Zakona o Državnoj agenciji za istrage i zaštitu, SIPA provjerava istinitost informacija koje su joj dostavljene na osnovu stava 1. ovog člana i konačan izvještaj podnosi organu nadležnom za imenovanje. Nijedna odredba ovog stava neće se naniziti, ni direktno ni indirektno, tako da se na bilo koji način ili u bilo kojoj formi prećuraju nadležnosti SIPE u sprečavanju, otkrivanju i istraživanju krivičnih djela i/ili da se na neki drugi način SIPA ovlašćuje da obavlja druge zadatke ili nadležnosti osim onih koji se strogo odnose na provjeravanje tačnosti podataka koji se dostavljaju na osnovu ovog stava.

Izborna komisija ocjenjuje, na osnovu informacija koje su joj dostavljene prema stavu 1. ovog člana i podataka iz službene evidencije, da li navedeno lice ispunjava uvjete za imenovanje i potvrđuje tome dostavlja organu nadležnom za imenovanje.

Konačan izvještaj iz stava 5. ovog člana i potvrda o ispunjavanju uvjeta dostavlja se Predsjedništvu BiH najkasnije osam dana, odnosno predsjedavajućem Vijeća ministara najkasnije 30 dana od dana kada su informacije dostavljene SIPA-i, odnosno Izornoj komisiji.

Sve informacije iz ovog člana obrađuju se saglasno Zakonu o zaštiti ličnih podataka.

Svi organi ili lica kojima se SIPA ili Izborna komisija obrate s ciljem izvršavanja svojih obaveza iz ovog Zakona u potpunosti će i efikasno s njima saradivati i odmah će im dostaviti svaku informaciju koju zatraže.

Postupak odlučivanja Izborne komisije propisan je Izbornim zakonom Bosne i Hercegovine. Pravni lijekovi propisani Izbornim zakonom Bosne i Hercegovine također se primjenjuju.

Član 10c.

Najkasnije u roku od dva dana od isteka odgovarajućeg roka utvrdjenog članom 10d. stav 7. ovog Zakona, Predsjedništvo BiH može nastaviti s postupkom imenovanja predsjedavajućeg Vijeća ministara samo kada se ispune svi sljedeći kriteriji:

- a) da je za navedeno lice Izborna komisija utvrdila da ispunjava sve uvjete propisane članom 10c. ovog Zakona;

- b) smatra da je, na osnovu diskrecione ocjene informacija dostavljenih u potpisanoj izjavi prema članu 10d. stavu 1. tački a) ovog Zakona i konačnog izvještaja iz člana 10d. stav 5. ovog Zakona, navedeno lice pogodan kandidat za dužnost na koju ga Predsjedništvo BiH namjerava imenovati.

Najkasnije u roku od dva dana od isteka odgovarajućeg roka utvrdjenog članom 10d. stav 7. ovog Zakona, predsjedavajući Vijeća ministara može nastaviti s postupkom imenovanja ministra ili zamjenika ministra samo kada se ispune svi sljedeći kriteriji:

- a) da je za navedeno lice Izborna komisija potvrdila da ispunjava sve uvjete propisane članom 10c. ovog Zakona;
- b) smatra da je, na osnovu diskrecione ocjene informacija dostavljenih u potpisanoj izjavi prema članu 10d. stav 1. tački a) ovog Zakona i konačnog izvještaja iz člana 10d. stav 5. ovog Zakona, navedeno lice pogodan kandidat za dužnost na koju ga predsjedavajući Vijeća ministara namjerava imenovati.

Član 10f.

U roku utvrdjenom članom 9. stav 1. ovog Zakona, Predsjedništvo BiH dostavlja Komisiji za pripremu izbora Vijeća ministara Predstavničkog doma Parlamentarne skupštine Bosne i Hercegovine (u daljnjem tekstu: Komisija) ime lica imenovanog za predsjedavajućeg Vijeća ministara, kao i sljedeće informacije:

- a) potpisanu izjavu, čiji oblik i sadržaj propisuje Izborna komisija, u kojoj imenovano lice daje podatke iz člana 10d. stav 1. tačke a) alineja od 1) do 6) ovog Zakona;
- b) službeni potvrdu Izborne komisije da navedeno lice ispunjava sve uvjete iz člana 10c. ovog Zakona.

U roku utvrdjenom u članu 10. stav 1. ovog Zakona, predsjedavajući Vijeća ministara dostavlja Komisiji ime lica imenovanog za ministra ili zamjenika ministra, zajedno sa svim informacijama iz stava 1. ovog člana.

Informacije iz ovog člana bit će dostupne javnosti.

Član 10g.

Na osnovu informacija dostavljenih saglasno članu 10f. ovog Zakona, Komisija odlučuje da li preporučuje Predstavničkom domu potvrdu izbora kandidata.

Kada ocjenjuje kandidata za dužnost predsjedavajućeg Vijeća ministara, Komisija daje preporuku najkasnije u roku od tri dana od dana kada je primila informacije. Za ocjenjivanje kandidata za dužnost ministra, odnosno zamjenika ministra, rok za davanje preporuke je osam dana.

Komisija može odlučiti, u rokovima iz stava 3. ovog člana, da održi sjednicu na kojoj će postavljati pitanja imenovanom licu vezano za informacije iz člana 10f. ovog Zakona i u pogledu njegove podobnosti za obavljanje poslova na položaju za koji se predlaže.

Svaka preporuka Komisije Predstavničkom domu ukazuje na broj glasova protiv kao i razloge za takve glasove.

Postupak ocjenjivanja referenci kandidata propisan ovim članom provodi se saglasno Poslovniku Predstavničkog doma.

Član 10h.

Predstavnički dom donosi odluku o potvrđivanju lica imenovanih na dužnosti predsjedavajućeg Vijeća ministara, ministara i zamjenika ministara u roku od tri dana od dana kada je primio preporuku Komisije.

Radi boljeg i efikasnijeg izvršavanja vladinih funkcija, predsjedavajući Vijeća ministara ima ovlaštenja da imenuje dva ministra za zamjenike predsjedavajućeg Vijeća ministara, koji stupaju na dužnost nakon što njihovo imenovanje odobri Predstavnički dom kao dio postupka odobravanja iz člana 10. ovog zakona.

Mandat Vijeća ministara je isti kao mandat Parlamentarne skupštine Bosne i Hercegovine.

Član 6.

Ukupni sastav Vijeća ministara će u toku cijelog mandata biti u potpunosti u skladu sa Ustavom Bosne i Hercegovine, naročito njegovim čl. 64.(b) i IX.3., te će se u skladu s tim u sastavu Vijeća ministara osigurati jednaka zastupljenost konstitutivnih naroda Bosne i Hercegovine.

Predsjedavajući Vijeća ministara i zamjenici predsjedavajućih su iz različitih naroda.

U sastav Vijeća ministara ili na dužnosti generalnog sekretara Vijeća ministara iz člana 24. ovog zakona mora se osigurati najmanje jedno mjesto za pripadnike ostalih.

Član 7.

Svaki ministar ima jednog zamjenika ministra.

Zamjenici ministara su iz različitih konstitutivnih naroda u odnosu na ministre.

Zamjenici ministara zamjenjuju ministre u slučaju njihove odsutnosti ili spriječenosti obavljajući dužnost.

Zamjenik ministra koji uostvaja na sjednici Vijeća ministara mjesto odsutnog ministra ima pravo odlučivati u njegovo ime po svim ili po pojedinim pitanjima u skladu sa ovlaštenjima koju mu odsutni ministar prenese i koji u tome pismeno obavijesti predsjedavajućeg Vijeća ministara.

Član 8.

Osni ministar koji je odgovoran za rad ministarstva u cjelini i zamjenik ministra, sa pravima i dužnostima iz prethodnog člana ovog zakona, svako ministarstvo ima i sekretara ministarstva, koji obavlja poslove i zadatke utvrdene Zakonom o državnoj službi u institucijama Bosne i Hercegovine i čije imenovanje se vrši u skladu sa odredbama tog zakona i uz poštovanje principa sadržanih u članu 6. ovog zakona.

IMENOVANJE, ODOBRAVANJE I SMJENJIVANJE VJEĆA MINISTARA

Član 9.

Predsjedavajućeg Vijeća ministara imenuje Predsjedništvo Bosne i Hercegovine kod svakog novog mandata Parlamentarne skupštine Bosne i Hercegovine, vodeći pri tom računa o principu zastupljenosti iz člana IX.3. Ustava Bosne i Hercegovine.

Odluka o imenovanju donosi se najkasnije osam (8) dana nakon održavanja konstituirajuće sjednice Predstavničkog doma Parlamentarne skupštine Bosne i Hercegovine (u daljem tekstu: Predstavnički dom) u novom sastavu.

Odluka o imenovanju se odmah dostavlja Predstavničkom domu Parlamentarne skupštine Bosne i Hercegovine na odobravanje.

Predsjedavajući Vijeća ministara stupa na dužnost nakon što njegovo imenovanje odobri Predstavnički dom.

Potvrda imenovanja predsjedavajućeg Vijeća ministara mora biti završena u roku od trideset (30) dana od dana imenovanja.

Član 10.

Prema članu 64. Ustava Bosne i Hercegovine, predsjedavajući Vijeća ministara imenuje ministre i zamjenike ministara odmah nakon stupanja na dužnost i odmah traži od Predstavničkog doma potvrdu imenovanja.

Ministri i zamjenici ministara stupaju na dužnost odmah nakon potvrde od strane Predstavničkog doma.

Potvrda imenovanja zamjenika predsjedavajućeg, ministara i zamjenika ministara mora biti završena u roku od trideset (30) dana od dana kada predsjedavajući Vijeća ministara preuzme dužnost.

Član 11.

Ako Predstavnički dom ne potvrdi odluku Predsjedništva BiH o imenovanju predsjedavajućeg Vijeća ministara, Predsjedništvo BiH je dužno u roku od osam (8) dana imenovati drugog predsjedavajućeg Vijeća ministara i takvu odluku dostaviti na potvrdu Predstavničkom domu.

Ako Predstavnički dom ne potvrdi odluku predsjedavajućeg Vijeća ministara o imenovanju ministra ili zamjenika ministra, predsjedavajući Vijeća ministara dužan je u roku ne dužem od osam (8) dana imenovati drugu osobu na to mjesto i takvu odluku dostaviti na potvrdu Predstavničkom domu, ili podnijeti ostavku.

Član 12.

Predsjedavajući Vijeća ministara može podnijeti ostavku bez obrazloženja.

Predsjedavajući Vijeća ministara podnosi ostavku Predsjedništvu BiH.

Ako predsjedavajući Vijeća ministara podnese ostavku ili ako je trajno spriječen da vrši svoju dužnost, Vijeće ministara daje ostavku u cjelini a dužnost obavlja do potvrde novog predsjedavajućeg i članova Vijeća ministara. U tom slučaju primjenjuje se postupak iz čl. 9. i 10. ovog zakona.

Član 13.

Predsjedništvo BiH može predložiti smjenu predsjedavajućeg Vijeća ministara. Ako Parlamentarna skupština BiH izglasa nepovjerenje predsjedavajućem, Vijeće ministara daje ostavku u cjelini, ali dužnost obavlja do potvrde novog predsjedavajućeg i članova Vijeća ministara. Parlamentarna skupština također može, na svoju inicijativu, izglasati nepovjerenje Vijeću ministara. U oba slučaja primjenjuje se postupak iz čl. 9. i 10. ovog zakona.

Član 14.

Ministri i zamjenici ministara mogu podnijeti ostavku bez obrazloženja.

Ministri i zamjenici ministara podnose ostavku predsjedavajućem Vijeću ministara.

Ako ministar ili zamjenik ministra podnese ostavku ili ako je trajno spriječen da vrši svoju dužnost, predsjedavajući Vijeća ministara imenuje njegovog nasljednika. Nasljednik ministra ili zamjenika ministara preuzima dužnost nakon što ga potvrdi Predstavnički dom u skladu sa postupkom predviđenim članom 10. ovog zakona.

Član 15.

Predsjedavajući Vijeća ministara može pokrenuti postupak za smjenu ministra i zamjenika ministara. Ako Parlamentarna skupština donese odluku o potvrdi smjene ministra ili zamjenika ministara, predsjedavajući Vijeća ministara dužan je u skladu sa postupkom predviđenim članom 10. ovog zakona imenovati novog ministra, odnosno zamjenika ministara.

Novoimenovani ministar odnosno zamjenik ministra poverljivošću datih dokumenata potvrde Predstavničkog doma.

NACIN RADA I ODLUČIVANJA

Član 16.

Članovi Vijeća ministara obavezni su sudjelovati u radu Vijeća ministara.

Vijeće ministara radi i odlučuje u sjednicama.

Vijeće ministara može održati sjednicu i odlučivati ako sjednicama prisustvuje više od polovine članova Vijeća ministara, od kojih, vodeći računa o člana IX.3. Ustava Bosne i Hercegovine, najmanje po dva iz svakog konstitutivnog naroda.

Pripreme i način održavanja i vođenja sjednica Vijeća ministara uređuju se potpuno Poslovnikom o radu Vijeća ministara (u daljem tekstu: Poslovnik).

Član 17.

U ostvarivanju svojih prava i dužnosti Vijeće ministara donosi odluke, zaključke i rješenja, usvaja nacrt i prijedloge zakona, analize, informacije, strategijske dokumenta, programe, sporazume, protokole i druga akta (u daljem tekstu: akta).

Član 18.

Vijeće ministara donosi akta iz svoje nadležnosti većinom glasova od ukupnog broja svojih članova o svim pitanjima i temama u kojima u daljoj proceduri konačno odlučuje Parlamentarna skupština Bosne i Hercegovine.

O svadim pitanjima Vijeće ministara u pravilu odlučuje konsenzusom osim ako se postigne konsenzus i postavljeno iz djelokruga Vijeća ministara, Poslovnika i njegovom namijenjenju.

U slučaju da se konsenzus ne postigne, predsjedavajući Vijeća ministara saziva člana odnosno članove Vijeća ministara koji je (su) protiv kako bi se postiglo rješenje. U slučaju da konsenzus ne bude postignut u roku od sedam dana ni na taj način, odluku donosi Vijeće ministara većinom glasova koja podrazumijeva i po najmanje dva člana iz svakog konstitutivnog naroda.

Član 19.

Odluke Vijeća ministara su donesene danom usvajanja na sjednici, osim ako Vijeće ministara ne odluči drugačije i objavljuje se u "Službenom glasniku BiH".

Član 20.

Organi i druga tijela vlasti u Bosni i Hercegovini dužni su u potpunosti se pridržavati odluka Vijeća ministara Bosne i Hercegovine donesenih u skladu sa nadležnostima Vijeća ministara Bosne i Hercegovine.

Član 21.

Vijeće ministara osigurava javnost svog rada.

ORGAN SLUŽBE I RADNA TIJELA

Član 22.

Radi osiguranja potpunog, djelotvornog, kvalitetnog i neokliđenog obavljanja poslova Vijeće ministara osniva stalne ili privremene urede, direkcije, službe, odbore i druga tijela.

Stalna tijela su:

Direkcija za EU integracije, Generalni sekretarijat, Ured za zakonodavstvo, Odbor za unutrašnju politiku i Odbor za ekonomiju.

Direkcija za EU integracije

Član 23.

Direkcija za evropske integracije vrši namđito poslove koji se odnose na usklađivanje aktivnosti tijela vlasti u Bosni i Hercegovini, nadzor nad provođenjem odluka koje donose nadležne institucije u Bosni i Hercegovini a koje se odnose na sve odgovarajuće aktivnosti potrebne za evropske integracije.

Direkcija učestvuje u aktivnostima ili izradi nacrtu i prijedloge politika, zakona, drugih propisa i smjernica koje se odnose na izvršenje poslova koje je Bosna i Hercegovina dužna postizati kako bi se uključila u procese evropske integracije.

Direkcija obavlja i druge poslove koji se odnose na pokretanje inicijativa i savjetovanje o pitanjima usklađivanja aktivnosti tijela vlasti u Bosni i Hercegovini na ispunjenju obaveza prema evropskim integracijama.

Direkcija za evropske integracije vrši i druge poslove i zadatke koje joj dodiđeli Vijeće ministara, odnosno predsjedavajući Vijeća ministara.

Direkcijom rukovodi direktor kojeg imenuje i razrješava Vijeće ministara na prijedlog predsjedavajućeg Vijeća ministara, u skladu sa Zakonom o državnoj službi u institucijama Bosne i Hercegovine.

Direktor je neposredno odgovoran za svoj rad predsjedavajućem Vijeća ministara.

Generalni sekretarijat

Član 24.

Generalni sekretarijat obavlja namđito poslove koji se odnose na: pripremu sjednica i sastanaka, vođenje zapisnika, vođenje evidencije, informiranje javnosti, praćenje provedbe odluka Vijeća ministara, protokol, obavlja materijalne-financijske, administrativne i tehničke poslove za Vijeće ministara u ostvarivanju njegovih zadataka, stara se o objavljivanju odluka Vijeća ministara u službenim glasilima te vrši i druge poslove koje mu odlukom dodiđeli Vijeće ministara.

Unutrašnja organizacija Generalnog sekretarijata uvrtuje se pravilnikom koji donosi Vijeće ministara.

Rukom Generalnog sekretarijata rukovodi generalni sekretar kojeg imenuje i razrješava Vijeće ministara na prijedlog predsjedavajućeg, u skladu sa Zakonom o državnoj službi u institucijama Bosne i Hercegovine.

Generalni sekretar je neposredno odgovoran za svoj rad predsjedavajućem Vijeća ministara.

Ured za zakonodavstvo

Član 25.

Ured za zakonodavstvo je uporedivan za davanje pravnog mišljenja o materijalima koji se upućuju Vijeću ministara u pogledu njihovog metodološkog jedinstva u pripremi i u pogledu usaglašenosti sa Ustavom BiH i zakonima BiH, za brigu o objavljivanju odluka u službenom glasniku BiH, entiteta i Brčko Distrikta BiH.

Uredom za zakonodavstvo rukovodi direktor.

Direktora Ureda imenuje i razrješava Vijeće ministara u skladu sa Zakonom o državnoj službi u institucijama Bosne i Hercegovine.

Odbor za unutrašnju politiku

Član 26.

Odbor za unutrašnju politiku je koordinirajuće tijelo za oblast iz djelokruga rada sljedećih ministarstava: Ministarstvo

ODLUKU**O DONOŠENJU ZAKONA O IZMJENAMA I DOPUNAMA ZAKONA O VIJEĆU MINISTARA BOSNE I HERCEGOVINE**

("Službeni glasnik BiH", br. 38/02, 30/03, 42/03, 81/06 i 76/07)

Zakon koji slijedi i koji čini sastavni dio ove Odluke, stupa na snagu kako je predviđeno u članu 7. ovog Zakona na privremenoj osnovi, sve dok ga Parlamentarna skupština Bosne i Hercegovine ne usvoji u istom obliku, bez izmjena i dopuna i bez dodatnih izvjeta.

Danom stupanja na snagu ovog Zakona prestaju da važe sve sprovedne odredbe Poslovnika o radu Vijeća ministara Bosne i Hercegovine ("Službeni glasnik BiH", br. 22/03).

Ova Odluka se objavljuje na službenoj Internet stranici Ureda visokog predstavnika i stupa na snagu odmah.

Ova Odluka se odmah objavljuje u "Službenom glasniku BiH".

Broj 11/07
19. oktobra 2007. godine
Sarajevo

Visoki predstavnik
Miroslav Lajčák, s. r.

ZAKON**O IZMJENAMA I DOPUNAMA ZAKONA O VIJEĆU MINISTARA BOSNE I HERCEGOVINE****Član 1.**

U članu 7. stav (3) Zakona o Vijeću ministara Bosne i Hercegovine ("Službeni glasnik BiH", br. 38/02, 30/03, 42/03, 81/06 i 76/07), ispred riječi: "Zamjenici ministara zamjenjuju ministre" dodaju se riječi: "Ako drugačije nije predviđeno ovim Zakonom".

U članu 7., sadašnji stav (4) zamjenjuje se novim stavom (4), koji glasi:

"Zamjenik ministra koji učestvuje na sjednici Vijeća ministara umjesto odsutnog ministra u skladu sa stavom (3) ovog člana, ima pravo odlučivati u njegovo ime po svim ili po pojedinim pitanjima u skladu sa ovlaštenjem koje mu odsutni ministar prenese i koji o tome pismeno obavijesti predsjedavajućeg Vijeća ministara."

Član 2.

U članu 14. stav (3), riječi: "najkasnije u roku od 15 dana od dana podnošenja njegove ostavke (ili) od dana kada je ustanovljeno da je ministar ili zamjenik ministra trajno spriječen da vrši svoju dužnost" dodaju se iza riječi: "imenuje njegovog nasljednika".

U članu 14. dodaju se novi stavovi (4) i (5), koji glase:

"(4) Zamjenik ministra privremeno obavlja dužnosti ministra tokom perioda između:

- a) dana kada ministar podnese ostavku i dana kada nasljednik navedenog ministra preuzme dužnost u skladu s postupkom predviđenim ovim zakonom; ili
- b) dana kada se ustanovi da je ministar trajno spriječen da vrši svoju dužnost i dana kada nasljednik navedenog ministra preuzme dužnost u skladu s postupkom predviđenim ovim zakonom.

(5) U slučaju da privremeno vršenje dužnosti iz stava (4) ovog člana nastane u vezi s ostavkom ministra odbrane (ili) ustanovljenje trajne spriječenosti vršenja dužnosti nastane u vezi s ministrom odbrane, predsjedavajući Vijeća ministara će odrediti koji od zamjenika ministra odbrane će privremeno obavljati dužnosti navedenog ministra tokom odgovarajućeg perioda propisanog u stavu (4) ovog člana."

Član 3.

U članu 15. dodaju se novi stavovi (3) i (4), koji glase:

"(3) Ako Parlamentarna skupština Bosne i Hercegovine donese odluku o potvrđi smjene ministra u skladu sa stavom (1) ovog člana, zamjenik ministra će privremeno obavljati dužnosti navedenog ministra tokom perioda između dana donošenja navedene odluke o potvrđi i dana kada novoimenovani ministar preuzme dužnost u skladu s postupkom predviđenim ovim zakonom.

(4) Ako Parlamentarna skupština Bosne i Hercegovine donese odluku o potvrđi smjene ministra odbrane u skladu sa stavom (1) ovog člana, predsjedavajući Vijeća ministara će odrediti koji zamjenik ministra će privremeno obavljati dužnosti navedenog ministra tokom perioda između dana donošenja navedene odluke o potvrđi i dana kada novoimenovani ministar preuzme dužnost u skladu s postupkom predviđenim ovim zakonom."

Član 4.

U članu 16. stav (2), poslije prve rečenice dodaje se sljedeći tekst:

"Po pravilu, sjednice Vijeća ministara održavaju se najmanje jednom sedmično, osim u opravdanim slučajevima utvrdjenim u Poslovniku Vijeća ministara Bosne i Hercegovine. Ako suprotno odredbama ovog zakona i odredbama navedenog Poslovnika predsjedavajući Vijeća ministara ne sazove dvije uzastopne sjednice Vijeća ministara, sjednici će zajednički sazivati zamjenici predsjedavajućeg."

U članu 16. stav (3), iza riječi: "članova Vijeća ministara", zarez se zamjenjuje tačkom i ostatak teksta se briše.

Član 5.

U članu 18. stav (1), riječi: "od ukupnog broja svojih članova" zamjenjuju se riječima: "članova koji su prisutni i glasaju".

U članu 18. stav (2), iza riječi "konsenzusom" a prije riječi: "a osobito o propisima", dodaju se riječi: "članova koji su prisutni i glasaju".

U članu 18. stav (3) riječi: "odluku donosi Vijeće ministara većinom glasova koja podrazumijeva i po najmanje dva člana iz svakog konstitutivnog naroda" zamjenjuju se riječima: "odluku donosi Vijeće ministara u skladu sa stavom (1) ovog člana, s tim da navedena većina podrazumijeva glas najmanje jednog člana iz svakog konstitutivnog naroda".

U članu 18. dodaje se novi stav (4), koji glasi:

"(4) U slučaju da zamjenik ministra zamjenjuje ministra u skladu s ovim zakonom, glas navedenog zamjenika ministra računa se za potrebe izračunavanja većine propisane u stavu (1) ovog člana i za potrebe utvrđivanja postojanja konsenzusa propisanog u stavu (2) ovog člana. Prilikom računanja većine propisane u stavu (3) ovog člana, računa se glas navedenog zamjenika ministra, ali se ne smatra glasom pripadnika bilo kojeg od konstitutivnih naroda."

Član 6.

Član 32. se briše i zamjenjuje novim članom 32, koji glasi:

"Predsjedavajućeg Vijeća ministara, u slučaju njegove odsutnosti ili druge vrste spriječenosti da obavlja svoje dužnosti, zamjenjuje najmlađi od zamjenika predsjedavajućeg Vijeća ministara. U tom slučaju, navedeni zamjenik predsjedavajućeg ima sva prava i dužnosti predsjedavajućeg Vijeća ministara."

Član 7.

Ovaj Zakon stupa na snagu danom objavljivanja u "Službenom glasniku BiH".

ZAKON O VIJEĆU MINISTARA BOSNE I HERCEGOVINE

(¹Neslužbeni prečišćeni tekst)

PRAVA I DUŽNOSTI VIJEĆA MINISTARA

Član 1.

Ovim zakonom uređuju se, u skladu sa Ustavom Bosne i Hercegovine, prava, dužnosti i odgovornosti Vijeća ministara Bosne i Hercegovine (u daljem tekstu: Vijeće ministara), njegovo ustrojstvo, način rada i odlučivanja, prava i dužnosti predsjedavajućeg, zamjenika predsjedavajućeg i članova Vijeća ministara, kao i odnos Vijeća ministara u vršenju funkcija prema drugim tijelima vlasti Bosne i Hercegovine.

Član 2.

Vijeće ministara je organ izvršne vlasti Bosne i Hercegovine koji vrši svoja prava i dužnosti kao vladine funkcije, u skladu sa Ustavom BiH, zakonima i drugim propisima Bosne i Hercegovine.

Član 3.

Sjedište Vijeća ministara je u Sarajevu.

¹ Neslužbeni prečišćeni tekst zakona sadrži: Odluku kojom se donosi Zakon o Vijeću ministara Bosne i Hercegovine -- Visoki predstavnik za Bosnu i Hercegovinu ("Službeni glasnik BiH", broj 38/02); Zakon o Vijeću ministara Bosne i Hercegovine ("Službeni glasnik BiH", broj 30/03); Zakon o izmjenama i dopunama Zakona o Vijeću ministara Bosne i Hercegovine ("Službeni glasnik BiH", broj 42/03) -- označeno **podebljanim slovima**; Zakon o izmjenama i dopunama Zakona o Vijeću ministara Bosne i Hercegovine ("Službeni glasnik BiH", broj 81/06) -- označeno **podvučnim slovima**; Zakon o izmjenama i dopunama Zakona o Vijeću ministara Bosne i Hercegovine ("Službeni glasnik BiH", broj 81/06) -- označeno *kosim slovima*; Zakon o izmjenama i dopunama Zakona o Vijeću ministara Bosne i Hercegovine ("Službeni glasnik BiH", broj 76/07) -- označeno **podebljanim kosim slovima**; Odluku o donošenju Zakona o izmjenama i dopunama Zakona o Vijeću ministara Bosne i Hercegovine -- Visoki predstavnik za Bosnu i Hercegovinu ("Službeni glasnik BiH", broj 81/07) -- označeno **podebljanim podvučnim slovima** i Zakon o izmjeni Zakona o Vijeću ministara Bosne i Hercegovine ("Službeni glasnik BiH", broj 24/08) -- označeno *kosim podvučnim slovima*.

Ovaj neslužbeni prečišćeni tekst služi samo za internu upotrebu i na njega se ne može pozivati prilikom službene upotrebe.

Član 4.

Vijeće ministara potpunije uređuje svoje unutrašnje ustrojstvo, kao i djelokrug i ovlaštenja službi koje obrazuje radi djelotvornog izvršavanja poslova iz svog djelokruga rada.

SASTAV VIJEĆA MINISTARA

Član 5.

Vijeće ministara, u skladu sa Općim okvirnim sporazumom za mir, i posebno članom III Aneksa 4. toga sporazuma (u kojem su predviđene odgovornosti i odnosi između institucija Bosne i Hercegovine i entiteta), čine predsjedavajući i ministri, i to:

- ministar vanjskih poslova,
- ministar vanjske trgovine i ekonomskih odnosa,
- ministar finansija i trezora,
- ministar komunikacija i prometa,
- ministar civilnih poslova,
- ministar za ljudska prava i izbjeglice,
- ministar pravde,
- ministar sigurnosti,
- **ministar odbrane.**

Radi boljeg i efikasnijeg izvršavanja vladinih funkcija, predsjedavajući Vijeća ministara ima ovlaštenja da imenuje dva ministra za zamjenike predsjedavajućeg Vijeća ministara, koji stupaju na dužnost nakon što njihovo imenovanje odobri Predstavnički dom kao dio postupka odobravanja iz člana 10. ovog zakona.

Mandat Vijeća ministara je isti kao mandat Parlamentarne skupštine Bosne i Hercegovine.

Član 6.

Ukupni sastav Vijeća ministara će u toku cijelog mandata biti u potpunosti u skladu sa Ustavom Bosne i Hercegovine, naročito njegovim čl. V.4.(b) i IX.3., te će se u skladu s tim u sastavu Vijeća ministara osigurati jednaka zastupljenost konstitutivnih naroda Bosne i Hercegovine.

Predsjedavajući Vijeća ministara i zamjenici predsjedavajućih su iz različitih naroda.

U sastav Vijeća ministara ili na dužnosti generalnog sekretara Vijeća ministara iz člana 24. ovog zakona mora se osigurati najmanje jedno mjesto za pripadnike ostalih.

Član 7.

Svaki ministar ima jednog zamjenika ministra, osim ministra odbrane, koji ima dva zamjenika ministra.

Zamjenici ministara su iz različitih konstitutivnih naroda u odnosu na ministra.

Ako drugačije nije predviđeno ovim Zakonom zamjenici ministara zamjenjuju ministre u slučaju njihove odsutnosti ili spriječenosti da obavljaju dužnost.

Zamjenik ministra koji učestvuje na sjednici Vijeća ministara umjesto odsutnog ministra u skladu sa stavom (3) ovog člana, ima pravo odlučivati u njegovo ime po svim ili po pojedinim pitanjima u skladu sa ovlaštenjem koje mu odsutni ministar prenese i koji o tome pismeno obavijesti predsjedavajućeg Vijeća ministara.

Član 8.

Osim ministra koji je odgovoran za rad ministarstva u cjelini i zamjenika ministra, sa pravima i dužnostima iz prethodnog člana ovog zakona, svako ministarstvo ima i sekretara ministarstava, koji obavlja poslove i zadatke utvrđene Zakonom o državnoj službi u institucijama Bosne i Hercegovine i čije imenovanje se vrši u skladu sa odredbama tog zakona i uz uvažavanje principa sadržanih u članu 6. ovog zakona.

IMENOVANJE, ODOBRAVANJE I SMJENJIVANJE VIJEĆA MINISTARA

Član 9.

Predsjedavajućeg Vijeća ministara imenuje Predsjedništvo Bosne i Hercegovine saglasno postupku utvrđenom ovim Zakonom kod svakog novog mandata Parlamentarne skupštine Bosne i Hercegovine, vodeći pri tom računa o principu zastupljenosti iz člana IX.3. Ustava Bosne i Hercegovine.

Odluka o imenovanju donosi se najkasnije 15 dana nakon održavanja konstituirajuće sjednice Predstavničkog doma Parlamentarne skupštine Bosne i Hercegovine (u daljem tekstu: Predstavnički dom) u novom sastavu.

Odluka o imenovanju se odmah dostavlja Predstavničkom domu Parlamentarne skupštine Bosne i Hercegovine na odobravanje.

Predsjedavajući Vijeća ministara stupa na dužnost nakon što njegovo imenovanje odobri Predstavnički dom.

Potvrda imenovanja predsjedavajućeg Vijeća ministara mora biti završena u roku od trideset (30) dana od dana imenovanja.

Član 10.

Prema članu V. 4. Ustava Bosne i Hercegovine, predsjedavajući Vijeća ministara, najkasnije u roku od 35 dana od dana kada Predstavnički dom potvrdi njegovo imenovanje, a u skladu s postupkom utvrđenim ovim Zakonom, imenuje ministre i zamjenike ministara i traži od Predstavničkog doma potvrdu imenovanja.

Ministri i zamjenici ministara stupaju na dužnost odmah nakon potvrde od strane Predstavničkog doma.

~~Potvrda imenovanja zamjenika predsjedavajućeg ministara i zamjenika ministara mora biti završena u roku od trideset (30) dana od dana kada predsjedavajući Vijeća ministara preuzme dužnost.~~

Član 10a.

Kandidat za dužnost predsjedavajućeg Vijeća ministara i kandidati za dužnosti ministra i zamjenika ministra imenuju se i potvrđuju saglasno postupku utvrđenim ovim Zakonom.

Član 10b.

Za predsjedavajućeg Vijeća ministara, ministra i zamjenika ministra ne može se imenovati lice za koje Centralna izborna komisija Bosne i Hercegovine (u daljnjem tekstu: Izborna komisija) utvrdi da ne ispunjava uvjete iz člana 10c. ovog Zakona.

Član 10c.

Da bi lice moglo biti imenovano, potrebno je da:

a) ispunjava sve potrebne uvjete za izbor kandidata propisane Izbornim zakonom Bosne i Hercegovine i da se na njega ne odnosi nijedna nespojivost dužnosti propisana tim zakonom;

b) je dostavilo sve informacije koje su potrebne Izornoj komisiji da ispuni svoje obaveze iz Zakona o sukobu interesa u institucijama vlasti Bosne i Hercegovine u slučaju da je potvrđeno imenovanje tog lica.

Član 10d.

Prije nego što Predsjedništvo Bosne i Hercegovine (u daljnjem tekstu: Predsjedništvo BiH) imenuje predsjedavajućeg Vijeća ministara iz člana 9. ovog Zakona, zatražit će od lica koje se imenuje da dostavi sljedeće:

a) potpisanu izjavu na obrascu koji propisuje Izborna komisija u kojoj navodi:

1) podatke o svojoj stručnoj spremi, ranije dužnosti, odnosno poslove koje je obavljalo, kao i odgovornosti koje je imalo u obavljanju tih dužnosti ili poslova;

2) da li je protiv njega izrečena kazna za krivično djelo;

3) da li je protiv njega potvrđena optužnica;

4) podatke o svojoj aktivnosti u periodu od januara 1992. do decembra 1995. godine, uključujući i informacije koje se odnose na zaposlenje, obavljanje političkih dužnosti, kao i angažman u oružanim snagama ili policiji u tom periodu;

5) podatke u vezi sa svojim imovnim stanjem, uključujući i podatke o finansijskim sredstvima i interesima;

6) pristanak da Državna agencija za istrage i zaštitu (u daljnjem tekstu: SIPA) provjeri istinitost informacija datih u potpisanoj izjavi;

7) kontakt-informacije, jedinstveni matični broj, broj lične karte ili broj pasoša,

b) uredno ispunjene obrasce koje propisuje Izborna komisija koji sadrže sve informacije koje su

Izbornoj komisiji potrebne da utvrdi da li navedeno lice ispunjava sve uvjete propisane u članu 10c. ovog Zakona.

Prije nego što predsjedavajući Vijeća ministara imenuje ministra ili zamjenika ministra, zatražit će od lica koje se imenuje dostavljanje svih informacija iz stava 1. ovog člana.

Organ nadležan za imenovanje prosljeđuje SIPI bez odgađanja informacije dostavljene na osnovu stava 1. tačke a) ovog člana.

Organ nadležan za imenovanje prosljeđuje Izbornoj komisiji bez odgađanja informacije dostavljene na osnovu stava 1. tačke b) ovog člana.

Saglasno članu 3. stav 1. tačka 8. Zakona o Državnoj agenciji za istrage i zaštitu, SIPA provjerava istinitost informacija koje su joj dostavljene na osnovu stava 3. ovog člana i konačan izvještaj podnosi organu nadležnom za imenovanje. Nijedna odredba ovog stava neće se tumačiti, ni direktno ni indirektno, tako da se na bilo koji način ili u bilo kojoj formi proširuju nadležnosti SIPIE u sprečavanju, otkrivanju i istraživanju krivičnih djela i/ili da se na neki drugi način SIPA ovlašćuje da obavlja druge zadatke ili nadležnosti osim onih koji se strogo odnose na provjeravanje tačnosti podataka koji se dostavljaju na osnovu ovog stava.

Izborna komisija ocjenjuje, na osnovu informacija koje su joj dostavljene prema stavu 4. ovog člana i podataka iz službene evidencije, da li navedeno lice ispunjava uvjete za imenovanje i potvrdu o tome dostavlja organu nadležnom za imenovanje.

Konačan izvještaj iz stava 5. ovog člana i potvrda o ispunjavanju uvjeta dostavlja se Predsjedništvu BiH najkasnije osam dana, odnosno predsjedavajućem Vijeća ministara najkasnije 30 dana od dana kada su informacije dostavljene SIPA-i, odnosno Izbornoj komisiji.

Sve informacije iz ovog člana obrađuju se saglasno Zakonu o zaštiti ličnih podataka.

Svi organi ili lica kojima se SIPA ili Izborna komisija obrate s ciljem izvršavanja svojih obaveza iz ovog Zakona u potpunosti će i efikasno s njima sarađivati i odmah će im dostaviti svaku informaciju koju zatraže.

Postupak odlučivanja Izborne komisije propisan je Izbornim zakonom Bosne i Hercegovine. Pravni lijekovi propisani Izbornim zakonom Bosne i Hercegovine također se primjenjuju.

Član 10e.

Najkasnije u roku od dva dana od isteka odgovarajućeg roka utvrđenog članom 10d. stav 7. ovog Zakona, Predsjedništvo BiH može nastaviti s postupkom imenovanja predsjedavajućeg Vijeća ministara samo kada se ispune svi sljedeći kriteriji:

a) da je za navedeno lice Izborna komisija utvrdila da ispunjava sve uvjete propisane članom 10c. ovog Zakona;

b) smatra da je, na osnovu diskrecione ocjene informacija dostavljenih u potpisanoj izjavi prema članu 10d. stavu 1. tački a) ovog Zakona i konačnog izvještaja iz člana 10d. stav 5. ovog Zakona, navedeno lice podoban kandidat za dužnost na koju ga Predsjedništvo BiH namjerava imenovati.

Najkasnije u roku od dva dana od isteka odgovarajućeg roka utvrđenog članom 10d. stav 7. ovog Zakona, predsjedavajući Vijeća ministara može nastaviti s postupkom imenovanja ministra ili zamjenika ministra samo kada se ispune svi sljedeći kriteriji:

a) da je za navedeno lice Izborna komisija potvrdila da ispunjava sve uvjete propisane članom 10c. ovog Zakona;

b) smatra da je, na osnovu diskrecione ocjene informacija dostavljenih u potpisanoj izjavi prema članu 10d. stav 1. tački a) ovog Zakona i konačnog izvještaja iz člana 10d. stav 5. ovog Zakona, navedeno lice podoban kandidat za dužnost na koju ga predsjedavajući Vijeća ministara namjerava imenovati.

Član 10f.

U roku utvrđenom članom 9. stav 2. ovog Zakona, Predsjedništvo BiH dostavlja Komisiji za pripremu izbora Vijeća ministara Predstavničkog doma Parlamentarne skupštine Bosne i Hercegovine (u daljnjem tekstu: Komisija) ime lica imenovanog za predsjedavajućeg Vijeća ministara, kao i sljedeće informacije:

a) potpisanu izjavu, čiji oblik i sadržaj propisuje Izborna komisija, u kojoj imenovano lice daje podatke iz člana 10d. stav 1. tačke a) alineja od 1) do 6) ovog Zakona;

b) službenu potvrdu Izborne komisije da navedeno lice ispunjava sve uvjete iz člana 10c. ovog Zakona.

U roku utvrđenom u članu 10. stav 1. ovog Zakona, predsjedavajući Vijeća ministara dostavlja Komisiji ime lica imenovanog za ministra ili zamjenika ministra, zajedno sa svim informacijama iz stava 1. ovog člana.

Informacije iz ovog člana bit će dostupne javnosti.

Član 10g.

Na osnovu informacija dostavljenih saglasno članu 10f. ovog Zakona, Komisija odlučuje da li preporučuje Predstavničkom domu potvrdu izbora kandidata.

Kada ocjenjuje kandidata za dužnost predsjedavajućeg Vijeća ministara, Komisija daje preporuku najkasnije u roku od tri dana od dana kada je primila informacije. Za ocjenjivanje kandidata za dužnost ministra, odnosno zamjenika ministra, rok za davanje preporuke je osam dana.

Komisija može odlučiti, u rokovima iz stava 2. ovog člana, da održi sjednicu na kojoj će postavljati pitanja imenovanom licu vezano za informacije iz člana 10f. ovog Zakona i u pogledu njegove podobnosti za obavljanje poslova na položaju za koji se predlaže.

Svaka preporuka Komisije Predstavničkom domu ukazuje na broj glasova protiv kao i razloge za takve glasove.

Postupak ocjenjivanja referenci kandidata propisan ovim članom provodi se saglasno Poslovniku Predstavničkog doma.

Član 10h.

Predstavnički dom donosi odluku o potvrđivanju lica imenovanih na dužnosti predsjedavajućeg Vijeća ministara, ministara i zamjenika ministara u roku od tri dana od dana kada je primio preporuku Komisije.

Član 10i.

Postupak imenovanja i potvrđivanja predsjedavajućeg Vijeća ministara, propisan ovim Zakonom, bit će završen najkasnije u roku od 22 dana od konstituirajuće sjednice Predstavničkog doma.

Postupak imenovanja i potvrđivanja ministara i zamjenika ministara, propisan ovim Zakonom, bit će završen najkasnije u roku od 70 dana od konstituirajuće sjednice Predstavničkog doma.

Član 11.

Ako Predstavnički dom ne potvrdi odluku Predsjedništva BiH o imenovanju predsjedavajućeg Vijeća ministara, Predsjedništvo BiH je dužno u roku od osam (8) dana imenovati drugog predsjedavajućeg Vijeća ministara i takvu odluku dostaviti na potvrdu Predstavničkom domu.

Ako Predstavnički dom ne potvrdi odluku predsjedavajućeg Vijeća ministara o imenovanju ministra ili zamjenika ministra, predsjedavajući Vijeća ministara dužan je u roku ne dužem od osam (8) dana imenovati drugu osobu na to mjesto i takvu odluku dostaviti na potvrdu Predstavničkom domu, ili podnijeti ostavku.

Član 11a.

Smatra se da je Vijeće ministara uspostavljeno i operativno kada se ispune sljedeći uvjeti:

a) da je predsjedavajući Vijeća ministara imenovan i potvrđen saglasno zakonu;

b) da je broj ministara i zamjenika ministara koji su imenovani i potvrđeni saglasno zakonu dovoljan da se osigura da Vijeće ministara može održavati sjednice i donositi odluke ili postupati saglasno ovom zakonu.

Dok Vijeće ministara ne bude uspostavljeno i operativno saglasno stavu 1. ovog člana, dotadašnje Vijeće ministara ostaje u tehničkom mandatu.

Član 12.

Predsjedavajući Vijeća ministara može podnijeti ostavku bez obrazloženja.

Predsjedavajući Vijeća ministara podnosi ostavku Predsjedništvu BiH.

Ako predsjedavajući Vijeća ministara podnese ostavku ili ako je trajno spriječen da vrši svoju dužnost, Vijeće ministara daje ostavku u cjelini a dužnost obavlja do potvrde novog predsjedavajućeg i članova Vijeća ministara. U tom slučaju primjenjuje se postupak iz čl. 9. i 10. ovog zakona.

Član 13.

Predsjedništvo BiH može predložiti smjenu predsjedavajućeg Vijeća ministara. Ako Parlamentarna skupština BiH izglasa nepovjerenje predsjedavajućem, Vijeće ministara daje ostavku u cjelini, ali dužnost obavlja do potvrde novog predsjedavajućeg i članova Vijeća ministara. Parlamentarna skupština također može, na svoju inicijativu, izglasati nepovjerenje Vijeću ministara. U oba slučaja primjenjuje se postupak iz čl. 9. i 10. ovog zakona.

Član 14.

Ministri i zamjenici ministra mogu podnijeti ostavku bez obrazloženja.

Ministri i zamjenici ministra podnose ostavku predsjedavajućem Vijeća ministara.

Ako ministar ili zamjenik ministra podnese ostavku ili ako je trajno spriječen da vrši svoju dužnost, predsjedavajući Vijeća ministara imenuje njegovog nasljednika, naikasnije u roku od 15 dana od dana podnošenja njegove ostavke i/ili od dana kada je ustanovljeno da je ministar ili zamjenik ministra trajno spriječen da vrši svoju dužnost. Nasljednik ministra ili zamjenika ministra preuzima dužnost nakon što ga potvrdi Predstavnički dom u skladu sa postupkom predviđenim članom 10. ovog zakona.

(4) Zamjenik ministra privremeno obavlja dužnosti ministra tokom perioda između:

a) dana kada ministar podnese ostavku i dana kada nasljednik navedenog ministra preuzme dužnost u skladu s postupkom predviđenim ovim zakonom; ili

b) dana kada se ustanovi da je ministar trajno spriječen da vrši svoju dužnost i dana kada nasljednik navedenog ministra preuzme dužnost u skladu s postupkom predviđenim ovim zakonom.

(5) U slučaju da privremeno vršenje dužnosti iz stava (4) ovog člana nastane u vezi s ostavkom ministra odbrane ili ustanovljenje trajne spriječenosti vršenja dužnosti nastane u vezi s ministrom odbrane, predsjedavajući Vijeća ministara će odrediti koji od zamjenika ministra odbrane će privremeno obavljati dužnosti navedenog ministra tokom odnosnog perioda propisanog u stavu (4) ovog člana.

Član 15.

Predsjedavajući Vijeća ministara može pokrenuti postupak za smjenu ministra i zamjenika ministra. Ako Parlamentarna skupština donese odluku o potvrđi smjene ministra ili zamjenika ministra, predsjedavajući Vijeća ministara dužan je u skladu sa postupkom predviđenim članom 10. ovoga zakona imenovati novog ministra, odnosno zamjenika ministra.

Novoimenovani ministar odnosno zamjenik ministra preuzima dužnost nakon potvrde Predstavničkog doma.

(3) Ako Parlamentarna skupština Bosne i Hercegovine donese odluku o potvrđi smjene

ministra u skladu sa stavom (1) ovog člana, zamjenik ministra će privremeno obavljati dužnosti navedenog ministra tokom perioda između dana donošenja navedene odluke o potvrđi i dana kada novoimenovani ministar preuzme dužnost u skladu s postupkom predviđenim ovim zakonom.

(4) Ako Parlamentarna skupština Bosne i Hercegovine donese odluku o potvrđi smjene ministra odbrane u skladu sa stavom (1) ovog člana, predsjedavajući Vijeća ministara će odrediti koji zamjenik ministra će privremeno obavljati dužnosti navedenog ministra tokom perioda između dana donošenja navedene odluke o potvrđi i dana kada novoimenovani ministar preuzme dužnost u skladu s postupkom predviđenim ovim zakonom.

NAČIN RADA I ODLUČIVANJA

Član 16.

Članovi Vijeća ministara obavezni su sudjelovati u radu Vijeća ministara.

Vijeće ministara radi i odlučuje u sjednicama. Po pravilu, sjednice Vijeća ministara održavaju se najmanje jednom sedmično, osim u opravdanim slučajevima utvrđenim u Poslovniku Vijeća ministara Bosne i Hercegovine. Ako suprotno odredbama ovog zakona i odredbama navedenog Poslovnika predsjedavajući Vijeća ministara ne sazove dvije uzastopne sjednice Vijeća ministara, sjednicu će zajednički sazvati zamjenici predsjedavajućeg.

Vijeće ministara može održati sjednicu i odlučivati ako sjednicama prisustvuje više od polovine članova Vijeća ministara. od kojih, vodeći računa o članu IX.3. Ustava Bosne i Hercegovine, najmanje po dva iz svakog konstitutivnog naroda.

Pripreme i način održavanja i vođenja sjednica Vijeća ministara uređuju se potpunije Poslovníkom o radu Vijeća ministara (u daljem tekstu: Poslovnik).

Član 17.

U ostvarivanju svojih prava i dužnosti Vijeće ministara donosi odluke, zaključke i rješenja, usvaja nacрте i prijedloge zakona, analize, informacije, strategijska dokumenta, programe, sporazume, protokole i druga akta (u daljem tekstu: akta).

Član 18.

Vijeće ministara donosi akta iz svoje nadležnosti većinom glasova članova koji su prisutni i glasaju o svim pitanjima i temama o kojima u daljoj proceduri konačno odlučuje Parlamentarna skupština Bosne i Hercegovine.

O ostalim pitanjima Vijeće ministara u pravilu odlučuje konsensusom članova koji su prisutni i glasaju a osobito o propisima, imenovanjima i postavljenjima iz djelokruga Vijeća ministara, Poslovniku i njegovom tumačenju.

U slučaju da se konsenzus ne postigne, predsjedavajući Vijeća ministara saziva člana odnosno članove Vijeća ministara koji je (su) protiv kako bi se postiglo rješenje. U slučaju da konsenzus ne bude postignut u roku od sedam dana ni na taj način, odluku donosi Vijeće ministara u skladu sa stavom (1) ovog člana, s tim da navedena većina podrazumijeva glas najmanje jednog člana iz svakog konstitutivnog naroda.

(4) U slučaju da zamjenik ministra zamjenjuje ministra u skladu s ovim zakonom, glas navedenog zamjenika ministra računa se za potrebe izračunavanja većine propisane u stavu (1) ovog člana i za potrebe utvrđivanja postojanja konsenzusa propisanog u stavu (2) ovog člana. Prilikom računanja većine propisane u stavu (3) ovog člana, uračunava se glas navedenog zamjenika ministra, ali se ne smatra glasom pripadnika bilo kojeg od konstitutivnih naroda.

Član 19.

Odluke Vijeća ministara su donesene danom usvajanja na sjednici, osim ako Vijeće ministara ne odluči drugačije i objavljuju se u "Službenom glasniku BiH".

Član 20.

Organi i druga tijela vlasti u Bosni i Hercegovini dužni su u potpunosti se pridržavati odluka Vijeća ministara Bosne i Hercegovine donesenih u skladu sa nadležnostima Vijeća ministara Bosne i Hercegovine.

Član 21.

Vijeće ministara osigurava javnost svog rada.

URED, SLUŽBE I RADNA TIJELA

Član 22.

Radi osiguranja potpunog, djelotvornog, kvalitetnog i usklađenog obavljanja poslova Vijeće ministara osniva stalne ili privremene urede, direkcije, službe, odbore i druga tijela.

Stalna tijela su:

Direkcija za EU integracije, Generalni sekretarijat, Ured za zakonodavstvo, Odbor za unutrašnju politiku i Odbor za ekonomiju, *Direkcija za ekonomsko planiranje, Ured koordinatora Brčko Distrikta Bosne i Hercegovine.*

Direkcija za EU integracije

Član 23.

Direkcija za evropske integracije vrši naročito poslove koji se odnose na usklađivanje aktivnosti tijela vlasti u Bosni i Hercegovini, nadzor nad provedbom odluka koje donose nadležne institucije u Bosni i Hercegovini a koje se odnose na sve odgovarajuće aktivnosti potrebne za evropske integracije.

Direkcija učestvuje u aktivnostima ili izrađuje nacрте i prijedloge politika, zakona, drugih propisa i smjernica koje se odnose na izvršenje poslova koje je Bosna i Hercegovina dužna poduzimati kako bi se uključila u procese evropske integracije.

Direkcija obavlja i druge poslove koji se odnose na pokretanje inicijativa i savjetovanje o pitanjima usklađivanja ukupnih procesa i aktivnosti tijela vlasti u Bosni i Hercegovini na ispunjenju obaveza prema evropskim integracijama.

Direkcija za evropske integracije vrši i druge poslove i zadatke koje joj dodijeli Vijeće ministara odnosno predsjedavajući Vijeća ministara.

Direkcijom rukovodi direktor kojeg imenuje i razrješava Vijeće ministara na prijedlog predsjedavajućeg Vijeća ministara, u skladu sa Zakonom o državnoj službi u institucijama Bosne i Hercegovine.

Direktor je neposredno odgovoran za svoj rad predsjedavajućem Vijeća ministara.

Generalni sekretarijat

Član 24.

Generalni sekretarijat obavlja naročito poslove koji se odnose na: pripremu sjednica i sastanaka, vođenje zapisnika, vođenje evidencije, informiranje javnosti, praćenje provedbe odluka Vijeća ministara, protokol, obavlja materijalno-finansijske, administrativne i tehničke poslove za Vijeće ministara u izvršavanju njegovih zadataka, stara se o objavljivanju odluka Vijeća ministara službenim glasilima te vrši i druge poslove koje mu odlukom dodijeli Vijeće ministara.

Unutrašnja organizacija Generalnog sekretarijata utvrđuje se pravilnikom koji donosi Vijeće ministara.

Radom Generalnog sekretarijata rukovodi generalni sekretar kojeg imenuje i razrješava Vijeće ministara na prijedlog predsjedavajućeg, u skladu sa Zakonom o državnoj službi u institucijama Bosne i Hercegovine.

Generalni sekretar je neposredno odgovoran za svoj rad predsjedavajućem Vijeća ministara.

Ured za zakonodavstvo

Član 25.

Ured za zakonodavstvo je mjerodavan za davanje pravnog mišljenja o materijalima koji se upućuju Vijeću ministara u pogledu njihovog metodološkog jedinstva u pripremi i u pogledu usuglašenosti sa Ustavom BiH i zakonima BiH, za brigu o objavljivanju odluka u službenom glasilu BiH, entiteta i Brčko Distrikta BiH.

Uredom za zakonodavstvo rukovodi direktor.

Direktora Ureda imenuje i razrješava Vijeće ministara u skladu sa Zakonom o državnoj službi u institucijama Bosne i Hercegovine.

Odbor za unutrašnju politiku

Član 26.

Odbor za unutrašnju politiku je koordinirajuće tijelo za oblast iz djelokruga rada slijedećih ministarstava: Ministarstvo za ljudska prava i izbjeglice, Ministarstvo civilnih poslova, Ministarstvo pravde i Ministarstvo sigurnosti.

Sva pitanja iz nadležnosti ministarstava iz stava 1. ovog člana, prije rasprave na sjednici Vijeća ministara obvezno se prethodno raspravljaju na sjednici Odbora za unutrašnju politiku.

Odborom, u pravilu, predsjedava zamjenik predsjedavajućeg Vijeća ministara, a čine ga ministri ili zamjenici ministra iz stava 1. ovog člana, predstavnici Direkcije za EU integracije i Ureda za zakonodavstvo, *Ured koordinatora Brčko Distrikta Bosne i Hercegovine* te drugi članovi u skladu sa odlukom Vijeća ministara.

Odbor za ekonomiju

Član 27.

Odbor za ekonomiju je koordinirajuće tijelo za oblasti iz djelokruga rada sljedećih ministarstava: Ministarstvo za vanjsku trgovinu i ekonomske odnose, Ministarstvo finansija i trezora i Ministarstvo komunikacija i prometa.

Sva pitanja iz nadležnosti ministarstava iz stava 1. ovog člana, prije rasprave na sjednici Vijeća ministara obvezno se prethodno raspravljaju na sjednici Odbora za ekonomiju.

Odborom, u pravilu, predsjedava zamjenik predsjedavajućeg Vijeća ministara, a čine ga ministri ili zamjenici ministra iz stava 1. ovog člana, predstavnici Direkcije za EU integracije i Ureda za zakonodavstvo, *Ured koordinatora Brčko Distrikta Bosne i Hercegovine* te drugi članovi u skladu sa odlukom Vijeća ministara.

Član 27a.

Direkcija za ekonomsko planiranje (u daljnjem tekstu: Direkcija) nadležna je za:

- 1. koordiniranje pripreme godišnjih, srednjoročnih i dugoročnih makroekonomskih projekcija,*
- 2. koordiniranje pripreme godišnjih, srednjoročnih i dugoročnih strategija razvoja,*
- 3. monitoring implementacije godišnjih, srednjoročnih i dugoročnih strategija razvoja,*
- 4. istraživanja i analizu ekonomskih trendova,*
- 5. istraživanja i analizu uključivanja svih slojeva društva u ekonomske tokove,*
- 6. ostala istraživanja koja joj dodijeli Vijeće ministara BiH, odnosno vlade entiteta i Brčko Distrikta BiH.*

Član 27b.

Direkcija u ostvarivanju nadležnosti iz člana 27a. ovog Zakona priprema i javno objavljuje sljedeće dokumente:

- 1. godišnje, srednjoročne i dugoročne makroekonomske projekcije,*
- 2. polugodišnje i godišnje izvještaje o ekonomskim trendovima u BiH,*
- 3. polugodišnje i godišnje izvještaje o implementaciji godišnjih, srednjoročnih i dugoročnih razvojnih strategija,*
- 4. godišnje izvještaje o stanju uključenosti svih slojeva društva u ekonomske tokove u BiH.*

U izradi dokumenata iz stava 1. ovog člana Direkcija je obavezna sarađivati sa svim relevantnim institucijama na svim nivoima vlasti u Bosni i Hercegovini.

Direkcijom rukovodi direktor, kojeg imenuje i razrješava Vijeće ministara Bosne i Hercegovine, u skladu sa Zakonom o državnoj službi u institucijama Bosne i Hercegovine.

Član 27.a

Ured koordinatora Brčko Distrikta Bosne i Hercegovine (u daljnjem tekstu: Ured koordinatora) nadležan je da vrši sve aktivnosti s ciljem koordinacije rada Vijeća ministara i Brčko Distrikta Bosne i Hercegovine, a u svrhu primjene konačne arbitražne odluke za Brčko.

Ured koordinatora naročito će imati sljedeće nadležnosti, prava i dužnosti:

- 1. da bude pravovremeno informiran o svim sjednicama Vijeća ministara;*
- 2. da prisustvuje svim sjednicama Vijeća ministara, Odbora za unutrašnju politiku i Odbora za ekonomiju;*
- 3. da, s ciljem realizacije poslova iz svoje nadležnosti, ima pristup svim materijalima, koji se pripremaju za sjednicu Vijeća ministara, materijalima koje Vijeće ministara prosljeđuje Parlamentarnoj skupštini Bosne i Hercegovine, kao i materijalima proslijeđenim Vijeću ministara od Parlamentarne skupštine Bosne i Hercegovine;*
- 4. da, po ovlaštenju predsjedavajućeg Vijeća ministara i predsjedavajućih Odbora za unutrašnju politiku i Odbora za ekonomiju, učestvuju u raspravi na sjednicama Vijeća ministara i oba odbora o svim tačkama dnevnog reda koje se odnose na Brčko Distrikt Bosne i Hercegovine, bez prava učešća u donošenju odluka;*
- 5. da posredstvom predsjedavajućeg Vijeća ministara predlaže tačke dnevnog reda iz svoje nadležnosti za sjednice Vijeća ministara.*

Član 27.b

Koordinator i osoblje Ureda koordinatora su javni službenici Brčko Distrikta Bosne i Hercegovine, u skladu sa zakonom Brčko Distrikta Bosne i Hercegovine kojim se uređuje status javnih službenika.

PRAVA I DUŽNOSTI PREDSJEDAVAJUĆEG I ČLANOVA VIJEĆA MINISTARA

Član 28.

Predsjedavajući predstavlja Vijeće ministara i odgovoran je:

1. za usklađivanje rada Vijeća ministara;
2. za usklađivanje ustavnih odnosa Vijeća ministara s radom Predsjedništva BiH, Parlamentarne skupštine BiH, kao i s entitetima i Brčko Distriktom BiH;
3. za osiguravanje saradnje između Vijeća ministara i vlada entiteta i nižih nivoa vlasti;
4. za sazivanje sjednica Vijeća ministara;
5. za predsjedanje sjednicama Vijeća ministara;
6. za dnevni red sjednica Vijeća ministara;
7. za provedbu odluka Vijeća ministara;
8. za rad Direkcije za EU integracije.

Član 29.

Predsjedavajući Vijeća ministara, u saradnji sa svojim zamjenicima, utvrđuje politiku rada Vijeća ministara, a posebno prioritete i dinamiku u radu Vijeća ministara.

Član 30.

Predsjedavajući Vijeća ministara posebno usklađuje i prati aktivnosti institucija vlasti u Bosni i Hercegovini vezane za integriranje Bosne i Hercegovine u EU.

U cilju djelotvornog obavljanja ovih poslova i zadataka predsjedavajućem Vijeća ministara je izravno odgovorna Direkcija za EU integracije.

Član 31.

Predsjedavajući Vijeća ministara za svoj rad odgovara Parlamentarnoj skupštini BiH i Predsjedništvu BiH.

Član 32.

Predsjedavajućeg Vijeća ministara, u slučaju njegove odsutnosti ili druge vrste spriječenosti da obavlja svoje dužnosti, zamjenjuje najmlađi od zamjenika predsjedavajućeg Vijeća ministara. U tom slučaju, navedeni zamjenik predsjedavajućeg ima sva prava i dužnosti predsjedavajućeg Vijeća ministara.

Član 33.

Članovi Vijeća ministara osim prava i dužnosti neposrednog rukovođenja radom ministarstva i odgovornosti za stanje u oblastima iz djelokruga rada ministarstva, mogu pokretati inicijativu i razmatrati pitanja i utvrđivati stajališta po pojedinim pitanjima i koja nisu iz djelokruga ministarstva kojim rukovode, s tim da ta pitanja spadaju u ustavnu nadležnost Vijeća ministara.

ODNOSI VJEĆA MINISTARA I DRUGIH TIJELA U BiH

Odnosi sa Parlamentarnom skupštinom Bosne i Hercegovine

Član 34.

Vijeće ministara odgovara za svoj rad Parlamentarnoj skupštini.

Vijeće ministara najmanje jednom godišnje podnosi izvještaj Parlamentarnoj skupštini, uključujući i izvještaj o budžetu.

Parlamentarna skupština može zatražiti da joj Vijeće ministara podnese i vanredni izvještaj o određenom pitanju.

Član 35.

Vijeće ministara Parlamentarnoj skupštini predlaže zakone i druge akte u okviru svoga djelokruga.

Na zahtjev Parlamentarne skupštine Vijeće ministara pripremit će prijedloge zakona, drugih akata i potrebnih materijala.

Član 36.

Vijeće ministara može predložiti sazivanje sjednice bilo kojeg doma ili radne komisije domova Parlamentarne skupštine, koje će na takav prijedlog postupati u skladu sa poslovníkom odgovarajućeg Doma.

Članovi Vijeća ministara imaju pravo i dužnost sudjelovati na sjednicama domova i radnih komisija Parlamentarne skupštine BiH.

Član 37.

Na pitanja članova Parlamentarne skupštine postavljena Vijeću ministara, Vijeće ministara daje odgovore, u skladu sa poslovnícima domova Parlamentarne skupštine i svom poslovníku.

Član 38.

Odnosi između Vijeća ministara i Parlamentarne skupštine bit će detaljno regulisani poslovnica domova Parlamentarne skupštine i Poslovníkom o radu Vijeća ministara.

Odnosi s drugim tijelima

Član 39.

Vijeće ministara redovno informira Predsjedništvo BiH o odlukama i drugim aktivnostima Vijeća ministara.

Član 40.

Vijeće ministara može predložiti tačke za dnevni red Predsjedništva i Predsjedništvo može predložiti tačke za dnevni red Vijeća ministara.

Član 41.

Predsjedništvo može predložiti sazivanje sjednice Vijeća ministara na kojoj bi se raspravljalo o pitanju od posebne važnosti za Predsjedništvo.

Član 42.

Vijeće ministara saraduje u okviru svoje nadležnosti sa izvršnim i zakonodavnim tijelima Federacije Bosne i Hercegovine, Republike Srpske i Brčko Distrikta Bosne i Hercegovine.

PRIJELAZNE I ZAVRŠNE ODREDBE

Član 43.

Sredstva za rad Vijeća ministara, Direkcije za EU integracije, Generalnog sekretarijata, Ureda za zakonodavstvo i drugih stalnih i privremenih tijela koje osniva Vijeće ministara osiguravaju se u budžetu Bosne i Hercegovine.

Član 43a.

Do izbora 2010. godine, za sva imenovanja i potvrde imenovanja na dužnosti iz čl. 9. i 10. ovog Zakona, koji se izvrše u tom periodu, svako lice dužno je, osim informacija iz čl. 10d. i 10f. ovog Zakona, navesti i to da li je ikada bilo smijenjeno odlukom Visokog predstavnika, donesenom saglasno Aneksu 10. Općeg okvirnog sporazuma za mir u Bosni i Hercegovini ili se na njega odnosila odluka za opstrukcije ili aktivnosti u suprotnosti s Općim okvirnim sporazumom za mir u Bosni i Hercegovini koju je donio IPTF na osnovu Aneksa 11. Općeg okvirnog sporazuma za mir u Bosni i Hercegovini ili se na njega odnosila odluka za opstrukcije ili aktivnosti u suprotnosti s Općim okvirnim sporazumom za mir u Bosni i Hercegovini donesena prema odredbama Glave 14. Uputstva stranama izdatim prema Aneksu I.A. Općeg okvirnog sporazuma za mir u Bosni i Hercegovini, bez obzira na to da li su pravne posljedice te odluke kasnije prestale, ograničene ili na drugi način promijenjene.

U periodu iz stava 1. ovog člana Predsjedništvo BiH i predsjedavajući Vijeća ministara, osim informacija iz člana 10f. ovog Zakona, dostavljaju Komisiji i informaciju iz stava 1. ovog člana.

U period iz stava 1. ovog člana uključeni su i izbori 2010. godine.

Član 44.

U roku od trideset (30) dana od stupanja na snagu ovog zakona Vijeće ministara će donijeti odluku o načinu nastavka rada Vijeća ministara, kojom će se po potrebi urediti izmjene odnosno raspuštanje postojećih administrativnih tijela koja obavljaju funkcije koje su u nadležnosti Bosne i Hercegovine.

Član 45.

U roku od trideset (30) dana od stupanja na snagu ovog zakona, Vijeće ministara će:

1. usvojiti Poslovnik o radu Vijeća ministara kojim će potpunije urediti pripreme i način održavanja i vođenja sjednica Vijeća ministara;
2. imenovati direktora Direkcije za EU integracije;
3. imenovati generalnog sekretara Vijeća ministara i
4. imenovati direktora Ureda za zakonodavstvo.

Član 46.

U roku od četrdeset i pet (45) dana od dana stupanja na snagu ovog zakona, Vijeće ministara će usvojiti Pravilnik o unutrašnjoj organizaciji stalnih tijela Vijeća ministara (Direkcije za EU integracije, Generalnog sekretarijata, Ureda za zakonodavstvo, Odbora za unutrašnju politiku i Odbora za ekonomiju).

Član 46a.

U roku od godinu dana od dana stupanja na snagu ovog zakona, donijet će se zakon kojim će se regulirati organizacija Vijeća ministara, na način da se osigura jednaka zastupljenost konstitutivnih naroda Bosne i Hercegovine, saglasno članovima V. 4. (b) i IX. 3. Ustava Bosne i Hercegovine.

Član 47.

Ovaj zakon se objavljuje u "Službenom glasniku BiH" odmah, a stupa na snagu 3. decembra 2002. godine.

Član 48.

Danom stupanja na snagu ovog zakona prestaje da važi Zakon o Vijeću ministara i ministarstvima Bosne i Hercegovine, objavljen u "Službenom glasniku BiH", broj 11/00, 17. aprila 2000. godine.

*

"Službeni glasnik BiH", broj 42/03

Član 4.

Ovaj zakon stupa na snagu osmog dana od dana objavljivanja u "Službenom glasniku BiH", a objavit će se i u službenim glasilima entiteta i Brčko Distrikta Bosne i Hercegovine.

**

"Službeni glasnik BiH", broj 81/06

Član 6.

Ovaj Zakon stupa na snagu osmog dana od dana objavljivanja u "Službenom glasniku BiH".

"Službeni glasnik BiH", broj 81/06

Član 3.

Ovaj Zakon stupa na snagu osmog dana od dana objavljivanja u "Službenom glasniku BiH".

"Službeni glasnik BiH", broj 76/07

Član 5.

Ovaj Zakon stupa na snagu osmog dana od dana objavljivanja u "Službenom glasniku BiH", a objavit će se u službenim glasilima entiteta i Brčko Distrikta Bosne i Hercegovine.

"Službeni glasnik BiH", broj 81/07

Član 7.

Ovaj Zakon stupa na snagu danom objavljivanja u "Službenom glasniku BiH".

"Službeni glasnik BiH", broj 24/08

Član 2.

Ovaj Zakon stupa na snagu osmog dana od dana objavljivanja u "Službenom glasniku BiH".